

*ASO LUA, 02 MATI 2021*

*Na toe faaauau Taualumaga a le Fono Aoaofa Faitulafono i le itula e 6:14 i le afiafi.*

*Na toe faaauau felafolafoaiga i luga o le iloiloga auiliili o le Tulafono Tau Faaofi o Teuteuga Esee (Aiaiga o Totogi ina ua Faamalolo le tumau mai le Galuega) 2021.*

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoaofa Faitulafono.

Malo le onosai, malo foi le tauatai i le faatinoga o le tatou galuega i lenei tauafiafi, ua maua le malosia e faaauau ai o tatou tiute.

**FUAIUPU 28: Ua teuteuina le Tulafono o le Pulega o Malae ma Fale Taalo a Samoa 2007.**

**FOFOGA FETALAI:** O lo o i ai le teuteuga a le Komiti i le Fuaiupu 28 o le Tulafono.

Ou te tapa ma le faaaloalo lau Afioga i le Taitaifono o le Komiti.

**Tofa NAFOITOA TALAIMANU KETI (Taitaifono Komiti o Tulafono Tumau, Mataupu Tau Faiga Palota ma Tofiga Taualoga):** Faafetai i lau Afioga i le Fofoga Fetalai. Ou te manatu o lea ua maua foi se lagona fou ma le malosia fou mai le Atua e faaauau ai galuega o lenei afiafi. Ae ua ou tulai atu ma le agaga faaaloalo lau Afioga i le Fofoga Fetalai e faatu le Teuteuga i le fuaiupu 28 e faapea:

**“TEUTEUGA:**

Ia suia le faafuaiupu (ID) e faapea:

**(ID) E le agavaa se tagata i lona totogi pe afai, e afua mai i le suesuega e faasino i mataupu o lona faamalolo le tumau ai, ua le toe faafaigaluega o ia”.**

*Faamaonia le Teuteuga.*

*Faamaonia le Fuaiupu 28 e pei ona teuteuina.*

**FUAIUPU 29: Ua teuteuina le Tulafono o le Faalapotopotoga o le Esetete Tausi a Samoa 1977.”**

**FOFOGA FETALAI:** O lo o i ai foi le teuteuga a le Komiti i le Fuaiupu 29.

Tulai mai le Taitaifono o le Komiti.

**Tofa NAFOITOA TALAIMANU KETI:** Lau Afioga i le Fofoga Fetalai ou te faatu le teuteuga i le Fuaiupu 29 o le Tulafono lea e faapea:

**“TEUTEUGA:**

Ia suia le faafuaiupu (ID) e faapea:

**(ID) E le agavaa se tagata i lona totogi pe afai, e afua mai i le suesuega e faasino i le mataupu o lona faamalolo le tumau ai, ua le toe faafaigaluega o ia”.**

*Faamaonia le Teuteuega.*

*Faamaonia le Fuaiupu 29 e pei ona teuteuina.*

**FUAIUPU 30: Ua teuteuina le Tulafono o le Pulega o le Suavai a Samoa 2003.**

**FOFOGA FETALAI:** Tulai mai lau Afioga i le Taitaifono mo le Teuteuga a le Komiti.

**Tofa NAFOITOA TALAIMANU KETI:** Lau Afioga i le Fofoga Fetalai ou te faatu le teuteuga i le fuaiupu 30 o le Tulafono lea e faapea:

**“TEUTEUGA:**

Ia suia le faafuaiupu (ID) i totonu o le parakalafa (a) e faapea:

**(ID) E le agavaa le Pule Faatonu i lona totogi pe afai e afua mai i le suesuega e faasino i le mataupu o lona faamalolo le tumau ai, ua le toe faafaigaluegaina o ia”.**  
**Ma**

Ia suia le faafuaiupu (6) i totonu o le parakalafa (d)(ii) e faapea:

**(6) E le agavaa se tagata ofisa poo se tagata faigaluega i lona totogi pe afai, e afua mai i le suesuega e faasino i le**

**mataupu o lona faamalolo le tumau ai, ua le toe faafaigaluega o ia.”**

*Faamaonia le Teuteuga.*

*Faamaonia le Fuaiupu 30 e pei ona teuteuina.*

**FUAIUPU 31: Ua teuteuina le Tulafono o le Faalapotopotoga o Suesuega Faasaienisi a Samoa 2006.**

**FOFOGA FETALAI:** Tulai maia lau Afioga i le Taitaifono mo le teuteuga a le Komiti.

**Tofa NAFOITOA TALAIMANU KETI:** Lau Afioga i le Fofoga Fetalai, o le agaga lava lea e tasi, ou te tulai ma le faaaloalo e faatu le teuteuga i le Fuaiupu 31 o le Tulafono o le Faalapotopotoga o Suesuega Faasaienisi a Samoa 2016 e faapea:

**“TEUTEUGA:**

Ia suia le faafuaiupu (10) i totonu o le parakalafa (a) e faapea:

**(10) E le agavaa le Ofisa Sili o Pulega i lona totogi pe afai e afua mai i le suesuega e faasino i le mataupu o lona faamalolo le tumau ai, ua le toe faafaigaluega o ia.” ma**

Ia suia le faafuaiupu (ID) i totonu o le (b) e faapea:

**(ID) E le agavaa se tagata i lona totogi pe afai, e afua mai i le suesuega e faasino i le mataupu o lona faamalolo le tumau ai, ua le toe faafaigaluega o ia.”**

*Faamaonia le Teuteuga.*

*Faamaonia le Fuaiupu 31 e pei ona teuteuina.*

**FUAIUPU 32: Ua teuteuina le Tulafono o Fesootaiga 2005.**

**FOFOGA FETALAI:** O lo o i ai le Teuteuga a le Komiti i le Fuaiupu 22.

Tulai mai le Taitaifono o le Komiti.

**Tofa NAFOITOA TALAIMANU KETI:** Lau Afioga i le Fofoga Fetalai ou te faatu le teuteuga i le fuaiupu 32 e faapea:

**“TEUTEUGA:**

Ia suia le faafuaiupu (3C) e faapea:

**(3C) E le agavaa le Pule Faatonu i lona totogi pe afai, e afua mai i le suesuega e faasino i le mataupu o lona faamalolo le tumau ai, ua le toe faafaigaluega o ia”.**

*Faamaonia le Teuteuga.*

*Faamaonia le Fuaiupu 32 e pei ona teuteuina.*

**FUAIUPU 33: Ua teuteuina le Tulafono o Atinae mo Tagata Tafafao Maimoa 2012.**

**FOFOGA FETALAI:** O lo o i ai foi le Teuteuga a le Komiti i le Fuaiupu e 33. Tulai mai lau Afioga i le Taitaifono.

**Tofa NAFOITOA TALAIMANU KETI:** Lau Afioga i le Fofoga Fetalai ou te faatu le teuteuga i le Fuaiupu 33 o le Tulafono lea e faapea:

**“TEUTEUGA:**

Ia suia le faafuaiupu (2C) i totonu o le parakalafa (a) e faapea:

**(2C) E le agavaa le Ofisa Sili o Pulega i lona totogi pe afai, e afua mai i le suesuega e faasino i le mataupu o lona faamalolo le tumau ai, ua le toe faafaigaluega o ia”.**

Ia suia le faafuaiupu (4A) i totonu o le parakalafa (b) e faapea:

**(4A) E le agavaa se tagata ofisa po o se tagata faigaluega i lona totgi pe afai, e afua mai i le suesuega e faasino i le mataupu o lona faamalolo le tumau ai, ua le toe faafaigaluega o ia.”**

*Faamaonia le Teuteuga.*

*Faamaonia le Fuaiupu 33 e pei ona teuteuina.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono o Teuteuga Eseese (Aiaiga o Totogi ina ua Faamalolo le tumau mai le Galuega 2020.**

**FOFOGA FETALAI:** O lo o i ai le faasaoga a le Komiti i le Fuaiupu 1 ma le Igoa.

Tulai mai le Afioga i le Taitaifono.

**Tofa NAFOITOA TALAIMANU KETI:** Faafetai i lau Afioga i le Fofoga Fetalai. Lau Afioga ou te tulai ma le faaaloalo e faatu le Faasaoga i le Fuaiupu 1 e faapea:

**“FAASAOGA:**

Ia aveese le fuainumera 2020 ma suia i le fuainumera 2021 ma faitauina ai le Igoa o le Tulafono e faapea:

**Tulafono o Teuteuga Eseese (Aiaiga o Totogi ina ua Faamalolo le tumau mai le Galuega) 2021.**

*Faamaonia le Faasaoga.*

**Tofa NAFOITOA TALAIMANU KETI:** Lau Afioga i le Fofoga Fetalai pe maua lava sina avanoa laitiiti. Ua maea ai le avanoa o lenei Komiti. Ma le faaaloalo.

**FOFOGA FETALAI:** Saunoa lau Afioga i le Taitaifono.

**Tofa NAFOITOA TALAIMANU KETI:** Faafetai i lau Afioga. E ia te au le agaga faaaloalo e fia faailoa ma momoli le faamalo i le mamalu o le Komiti o Tulafono Tumau, Faiga Palota ma Tofiga Taualoa a le Malo e pei ona matou galulule ma outou faafofoga i ai i lenei aso. o le matou galuega mulimuli lenei o lenei tausaga.

Ou te tulai ai i lou tiute faa-Taitaifono e momoli le faamalo ma le faafetai i le Tama Matua o le Toe Ulutaia o lenei Maota, le Afioga ia Aeau ona o le feagai ai ma le tiute i lenei 5 tausaga. Faafetai tele le fesoasoani, faafetai i le tuualalo. Sa lagona lava le lototele i le tauaveina o le tiute faa-Taitaifono o le tatou Komiti ona o le tuualalo a lau Afioga i le Tama Matua Aeau Peniamina e pei ona tatou galulue ai i le Komiti. E momoli le faamalo ma le faafetai i lau Afioga i le Gafatasi lau Afioga Fuimaono Teo Samuelu, lau Afioga i le Sui Taitaifono o lenei Komiti mo le galuega sa tatou fitaituga i ai i lenei tausaga. O lea ua iu le tatou galuega. Ia o lea ua faafofoga mai le itumalo o Falealili Sasae, matou te momoli atu le faafetai tele ua maua lagona maua manatu ona o le lagolagosua a lau Afioga i le Gafatasi. Faafetai Fuimaono.

E momoli foi le faamalo ma le faafetai i lau tofa Nonu e pei ona tatou feagai ai i le tatou galuega. Ia, e le mafai lava ona ou alu loa, e ao ona ou afe ina ua ou maua le avanoa. Matou te momoli atu ai le faafetai tele i le tiute ma le faiva sa tatou feagai ai i lenei 5 tausaga. O lea ua faaiu le Paeaiga, e leai se mea e gase i le tatou nonofo ai. O lo outou finagalo ua tau manu ai le faamoemoe o le tatou Komiti.

Lau Afioga Amituanai Afoa le sui faipule mai Palauli Sisifo, e momoli aloaia atu le faafetai tele, a o maua ai lo matou avanoa mulimuli, ia faafetai mo le tatou galuega. E tele lagona tele fautuaga sa tuuina mai, a lea ua ae manuia ai faiva o lenei tausaga. Ia tau ia ina alofagia e le Atua tatou feagai ai i faiga filifiliga a le atunuu e pei ona loloma i lenei masina fou, ia i ai le alofa ma le agalelei o le Atua. Ia o le matou tala lea ma le agaga faaaloalo, faamanuia le Atua i le paia o le Palemene i lau Afioga i le Taitai o le Malo ma le Aiga Kapeneta, ia faapea foi Minisita Lagolago. Taitaifono o Komiti Tumau a le Palemene, faafetai tele. Malo i lo outou sao i la matou galuega ma le matou foi pitolaau, a lea ua iu manuia le faamoemoe o lenei aso. Faamanuia le Atua i filifiliga a le atunuu e pei ona tatou alo atu i ai i lenei tausaga.

Ia, o le matou tala lea ma le agaga faaaloalo lau Afioga i le Fofoga Fetalai. Faafetai tele mo lo matou avanoa. Faamanuia le Alii i toega o totoe o le Fonousu a le atunuu. Faafetai.

*Faamaonia le Fuaiupu 1 ma le Igoa e pei ona faasaoina.*

*Na faagasolo le Tulafono Tau Faaofi o Teuteuga Eseese (Aiaiga o Totogi ina ua Faamalolo le tumau mai le Galuega) 2021.*

**TULAFONO TAU FAAOFI O AUAUNAGA O LE VAAI TAU,  
SUSUEGA FAASAIENISI O ELEELE MA LE OSONE 2020 –  
iloiloga auiliili**

**FOFOGA FETALAI:** E tusa ai ma Tulafono Tumau e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona faatoa sagai atu ai lea mo le iloiloga auiliili.

Tulai mai le Afioga ile Taitaifono o le Komiti.

**Afioga TAFUA MALUELUE TAFUA (Taitaifono Komiti Vaega o Atinae Eseese):** E faatalofa atu i lenei itula afiafi i lau Afioga i le Fofoga Fetalai, ua momoli mai lou soifua ma so matou ola ia faapea foi le mamalu o le Palemene ma le faafofogaaga a Samoa. Ae ou te tulai atu ma le agaga faaaloalo e faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai ina ia faagasolo le*

*Tulafono Tau Faaofi o Auaunaga o le Vaai Tau, Suesuega Faasaienisi o Eleele ma le Osona 2020 faatasi ma Faasaoga.*

*Faaluaina e le sui usufono mo Anoamaa Ssisifo ma le sui usufono mo Faasaleleaga Nu.1 Sisifo.*

*Na faamaonia le lafo.*

**FOFOGA FETALAI:** O lea ua faamaonia e le Fono Aoao le Lipoti a le Komiti i le Tulafono Tau Faaofi ma o le a sagai atu loa mo le iloiloga auiliili.

E tusa ai ma Tulafono Tumau, e amata le iloiloga auiliili i le Fuaiupu 2.

**FUAIUPU 2: Faamatalaina o uiga o upu.**

*Faamaonia.*

**FUAIUPU 3: Sini.**

*Faamaonia.*

**FUAIUPU 4: Faaauauina o le Vaega.**

*Faamaonia.*

**FUAIUPU 5: Faauluuluga o le Vaega.**

*Faamaonia.*

**FUAIUPU 6: Tofiaina o isi tagata ofisa ma le aufaigaluega.**

*Faamaonia.*

**FUAIUPU 7: Tiute ma matafaioi.**

*Faamaonia.*

**FUAIUPU 8: Taiala**

*Faamaonia.*

**FUAIUPU 9: Faatuatuaina o Talitonuga Faasaienisi.**

*Faamaonia.*

**FUAIUPU 10: Puipuiga o aia tatau o meatotino tau le atamai.**

**FUAIUPU 11: Faaaogaina o le Tulafono o Galuega a le Malo 2004.**

*Faamaonia.*

**FUAIUPU 12: Faavaeina o le Faiga Faatekonolosi e Vave Lapatai ai Aafiaga Ogaoga Eseese.**

*Faamaonia.*

**FUAIUPU 13: Tuuina atu o fautuaga ma lapataiga e le Vaega.**

*Faamaonia.*

**FUAIUPU 14: Faalauiloa atu o lapataiga i tagata lautele.**

*Faamaonia.*

**FUAIUPU 15: Tuufaatasia ma le tuuina atu o faasilasilaga o tala faavaitaimi o le tau.**

*Faamaonia.*



**FUAIUPU 16: Noataga e feutagai ai ma galulue felagolagomai.**

*Faamaonia.*

**FUAIUPU 17: Faataunuina o noataga faaitulagi ma faava o Malo.**

*Faamaonia.*

**FUAIUPU 18: Puipuiga mai noataga tau le tagata lava ia.**

*Faamaonia.*

**FUAIUPU 19: Soligatulafono.**

*Faamaonia.*

**FUAIUPU 20: Tulafono Faatonutonu.**

*Faamaonia.*

**FUAIUPU 21: Meatotino a le Vaega.**

*Faamaonia.*

**FUAIUPU 22: Aiaiga tau soloaiga.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono o Auaunaga tau Vaai Tau, Suesuega  
Faasaienisi o Eleele ma le Osone 2020.**

**FOFOGA FETALAI:** O lo o o i ai le Faasaoga i le Fuaiupu 1 ma le Igoa a le Komiti.

Ou te tapa le Taitaifono o le Komiti.

**Afioga TAFUA MALUELUE TAFUA:** Lau Afioga i le Fofoga Fetalai pe a talafeagai ma lou finagalo, na o si na upu puupuu lava i le Matagaluega sa matou iloiloina lenei Tulafono, talu ai e aumai ua amata le Fonotaga lenei. Ma le faaaloalo lava.

Faafetai. Avea ia lenei itula e molimoli atu ai le faafetai ma le faamalo i le Pulega, aemaise le vaega o le Ofisa o le Loia Sili ae le gata i lea o le Pulega o le Siosiomaga.

E faapitoa le faafetai i le Vaega o le Vaai Tau sa tatou faatasi i Mulinuu e 3 aso. E momoli atu ai le agaga faafetai ma le faamalo. Avea foi lenei avanoa e faafetai atu ai i le Komiti, le Afioga ia Faaulusau faapea le Afioga Tapulesatele, malo le galulue faafetai mo tuualalo. Ia o le agaga faafetai.

A o lenei taimi lau Afioga i le Fofoga Fetalai, ou te faatu le Faasaoga i le fuaiupu 1 ma le Igoa o le Tulafono Tau Faaofi e faapea:

**“FAASAOGA:**

Ia aveese le fuainumera 2020 ma suia i le fuainumera 2021 ma faitauina ai le Igoa o le Tulafono e faapea:

**Tulafono o Auaunaga tau Vaai Tau, Suesuega Faasaaienisi o Eleele ma le Osone 2021.”**

Ma le faaaloalo.

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Auaunaga tau Vaai Tau, Suesuega Faasaaienisi o Eleele ma le Osone 2021 faatasi ma le Faasaoga.*

**TULAFONO TAU FAAOFI O TEUTUGA O LE TULAFONO O  
LE FAAMAUINA O PULE O FANUA 2021 – faitauga faatolu**

**Susuga Hon TUILAEP AUELUA FATIALOFA LUPESOLIAI  
LOLOFIETELE NEIOTI AIONO GALUMALEMANA Dr.  
SAILELE MALIELEGAOI:** Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faitauina nei le*

*Tulafono Tau Faaofi o Teuteuga o le Tulafono o le Faamauina o Pule o Fanua 2021 i lona faitauga faatolu.*

*Faaluaina e le Minisita o Pisinisi, Alamanuia ma Leipa.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA ESEESE (AIAIGA O TOTOGI INA UA FAAMALOLO LE TUMAU MAI LE GALUEGA) 2021 – faitauga faatolu**

**Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga Eseese (Aiaiga o Totogi ina ua Faamalolo le tumau mai le Galuega) 2021 i lona faitauga faatolu.*

*Faaluaina e le Minisita o Pisinisi, Alamanuia ma Leipa.*

*Na faamaonia le lafo ma faitauina le Tulafono i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O AUAUNAGA TAU VAAI TAU, SUESUEGA FAASAIENISI O ELEELE MA LE OSONE 2021 – faitauga faatolu**

**Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Auaunaga tau Vaai Tau, Suesuega Faasaienisi o Eleele ma le Osone 2021 i lona faitauga faatolu.*

*Faaluaina e le Minisita mo Pisinisi, Alamanuia ma Leipa.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** Ia, silasila mai i le mafiafia o le galuega o lenei aso, ia o lea ua maea. Ma o le mutaaga foi lea o galuega o le Fono lenei, o le toe Fono foi lenei a le tatou Paeaiga, ua matua maea lelei ona faagasolo ma faatino.

E momoli atu ai le agaga faamalo ma le agaga faafetai. E le faigofie tiute ma faiva, ae ua faafaigofie i le agalelei o le Atua ua faapena ona tautoaluaina pea i tatou i Lona agaga fesoasoani ua mafai ona tatou faatinoina nei galuega. O le a se mea ua tatou faia e lelei ma matagofie, ia foi le viiga i le Atua.

Ia, ou te tapa lau Afioga i le Taitai o le Malo lau Afioga i le Palemia.

## **LAFO A LE PALEMIA MA LANA SAUNOAGA FAAFETAI**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, o lea ua maea le pasiaina o Tulafono sa feagai ma le Maota. Ma o se taimi mulimuli ona ou agai lea i se upu mai le Malo. Ae i le faagasologa o le tatou Fonotaga, sa ou faailoa atu ai, o le faaiuga o le faagasologa o Galuega. O le a ou tulai atu ai e faatu se lafo, ina ia tagofia ai se mataupu e ono faatasina ai le mamalu o le Palemene leni o Samoa. O le agaga o le lafo, ia faatumau le mamalu e pei ona i ai mai le amataga. Ae ua lamatia le taua lea ona o ni aga ua tutupu mai, a o faagasolo ia le faaiuga o le Paeaiga leni. Ma o lea la ou te tulai atu ai ma le agaga faaaloalo.

E tusa ai ma le Tulafono Tumau 65(0), ou te faatuina ai se lafo e faitauina e faapea: E talu ai o le tulata o le taimi atofa mo le faataapeina o le Palemene o Samoa, mo le faiga palota i ona tulaga masani ai. Ae o le faatoa aliae mai ai, ni uiga e ono solia ai Tulafono Tumau o le Palemene mamalu leni o le Malo Tutoatasi o Samoa. E ni sui usufono o le Palemene e toa-fa, le Afioga ia Laauli Leuatea Polataivao Schmidt, Afioga Fiamē Naomi Mataafa, Olo Fiti Vaai ma Faumuina Wayne Fong, e toa-fa i latou. I le le auai i nisi o Fonotaga a le Palemene Lona XVI o Samoa. Ou te faatuina ai se lafo e faapea: *1. O le masalomia o le soliaina o Tulafono Tumau, e sui a faipule e toa-fa. O Laauli Leuatea Polataivao Schmidt, Fiamē Naomi Mataafa, Olo Fiti Vaai ma Faumuina Wayne Fong. 1. I le le auai i Fonotaga a le Palemene, mai le aso 19 Ianuari 2021 i le Aso 2 o Mati 2021, e aunoa ma se faatagaga aloaia a le Fofoga Fetalai. Ma e le o ni mafuaaga talafeagai foi le toesea e faia ni faiga faatosina ma faalauiloa o Faiga Faaupufai, na mafua ai ona le auai i Fonotaga. Aua na faia nei tulaga, a o usuia le Fono mamalu a le Palemene. Ma ono solia ai Tulafono Tumau 24 ma le 25(2). Le le utagia e le toa-fa leni, o le auai i Fonotaga i itula atofaina e tusa lava pe na auai i se Fono ae le atoa le taimi faatapulaa, e tatau ona ausia mo se aso fono. O ni gaoioiga e ono solia ai le Tulafono Tumau 24(3) ma le (4). 3. O le faatinoina o ni amioga le tatau ai ma le mamalu o sui a faipule, e aofia ai le faia o ni faamatalaga i luga o so o se alaleo, ala ata po o upega tafailagi, e ono taitaiseseina ma faasese ai le mamalu o le atunuu, e faatatau i galuega a le Palemene po o le Malo. E aofia ai ma ni amioga e ono taua o ni*

amioga fouvale, treasonous. O ni gaoioiga na faatino a o usuia le Fonotaga mamalu a le Palemene ma ona solia ai Tulafono Tumau 14 ma le 15. Ia tagofia e se Komiti Suesue Faapitoa Tutoatasi, e faatuina i fafo atu o le Palemene e pei ona fuafuaina e le Palemene e tusa ai ma le Tulafono Tumau 15. 2. O le galuega a lenei Komiti Faapitoa, ia faatino i luga o taijala nei, (a). Ia suesueina pe na soliaina Tulafono Tumau e sui a faipule e toa-fa o Laauli Leuatea Polataivao Schmidt, Fiame Naomi Mataafa, Olo Fiti Vaai, ma Faumuina Wayne Fong. (1) I le le auai i Fonotaga a le Palemene mai le aso 19 Ianuari 2021 i le aso 2 o Mati 2021. E aunoa ma se faatagaga aloaia a le Fofoga Fetalai, ma e le o ni mafuaaga talafeagai foi, le toesea e faia ni faiga faatosina ma faalauiloa o Faiga Faaupufai, na ala ai ona le auai i Fonotaga. Ua na faia nei tulaga a o usuia le Fono a le Palemene mamalu. Ma e ono solia ai Tulafono Tumau, 24 ma le 25. (2). I le le utagia e le toa-fa nei o le auai i Fonotaga i itula atofaina, e tusa lava pe na auai i isi Fono, ae le atoa le taimi faatapulaa, e tatau ona ausia mo se aso Fono, o ni gaoioiga e ono solia ai Tulafono Tumau 24 (3) ma le (4). Ma 3. I le faatinoina o ni amioga le tatau ai mo sui a faipule, e aofia ai le faia o ni faamatalaga i luga o so o se alaleo, alaata, po o le upega tafailagi e ono taitaisese ma faasese ai le mamalu o le atunuu. E faatatau i galuega a le Palemene mamalu po o le Malo e aofia ai ma ni amioga e ono taua o ni amioga fouvale, treasonous. O ni gaoioiga na faatino a o usuia le Fono mamalu a le Palemene ma ono solia ai Tulafono Tumau 14 ma le 15. (b). Ia tofia i latou nei e fai ma sui o le Komiti Faapitoa, (1) Faamasino litaea e avea ma Taitaifono. (2) O le Komesina o Sulufaiga. (3) O se Loia Sinia Tutoatasi o lo o galue i fafo atu o le Malo. (c) Ia i ai le Komiti Faapitoa le malosiaga ma le matafaioi faa-Komisi Suesue, e pei ona aiaia i lalo o le Tulafono o Komisi Suesue 1964. (d). Ia tuuina atu e le Komiti Faapitoa le latou lipoti i le iuga o latou suesuega i le Failautusi o le Maota i totonu o le 3 masina. E amata mai i le aso e tuuina atu i ai lenei mataupu. O le lipoti a le Komiti Faapitoa, e avea ma faamaumauga a le Palemene, ma o le a noatia lona faaaogaina, ma tuuina atu i ai puipuiga e pei ona aiaia e le Tulafono Tumau 38. (e). Ia lipotia mai e le Failautusi o le Maota i le isi Palemene o lo o loma, lenei mataupu mo le Palemene Lona XVII, ina ia faia i ai se faaiuga e tatau ai. 3. O gaoioiga a le toa-fa lenei ma le masalomia o le solia o Tulaono Tumau, ua ala ai ona faatu lenei lafo. O ni gaoioiga na faatino i taimi a o usuia le Fono mamalu a le Palemene, mai le aso 19 Ianuari 2021 seia oo mai i le aso 2 Mati 2021. Talu ai ua maea le iloiloga o Tulafono Tumau e pei ona masani ai, ma le tulata i le faataapeina o le Palemene mo le faiga palota o lo o loma nei, ua le mafai ai ona tuuina atu nisi fautuaga, mo ni teuteuga e faatatau i nei gaoioiga po o le tuuina atu o lenei mataupu i le Komiti o Tulaga Aloaia ma Amio Taualoa a le Palemene. Ma e pau lava le avanoa e mafai ai, o le fai o se faatatau i nei gaoioiga ua aliaae, a o iloilo Tulafono Tumau, ma le faatuina atu o lenei lafo ina ia pasia. O se taumafaiga lenei, ia fai ai se faatatau i gaoioiga a le toa-fa, le toa-fa

*lenei ma ia foia ai le tulai mai o ni faavae le talafeagai, mo le mamalu o le Palemene o Samoa i le lumanai. O lo o faatali mai foi le mamalu o le atunuu i se tali atu a le Palemene, aua o le Palemene o se itutino na te pulea lava ia, e ala atu lea i ana Tulafono Tumau. Ma e tataua lava i sui ona faautagia nei Tulafono. Aua e le sili atu le Palemene i Tulafono Tumau, ma o so o se soligatulafono i Tulafono Tumau, e faia e sui a faupule, e tataua lava ona faia i ai se faaiuga. E talu ai ua tulata le taimi e faataape ai le Palemene, e le tataua ona avea lena tulaga, ma se mea e faaitiitia ai le taualoa ma le tulaga mamalu o le Palemene o le Malo Tutoatasi o Samoa. O nei tulaga e tataua i sui uma o le Palemene ona utagia aemaise o latou tautoga na faia i totonu o le Palemene lenei, faapea foi le faafogafoga mai a lo tatou atunuu pele o Samoa.*

O le lafo lena lau Afioga i le Fofoga Fetalai.

*Faaluaina e le Minisita o Tina ma Tamaitai Atinae o Nuu ma Afioga ma Agafesootai ma le Minisita o Pisinisi, Alamanuia ma Leipa.*

**FOFOGA FETALAI:** Ou te toe tapa lau Afioga mo lau saunoaga.

**Susuga Hon Laauli Polataivao Leuatea:** Lau Afioga i le Fofoga Fetalai, pe maua lava se avanoa. O lea lava ua faataunuu le finagalo o le Palemia ma lo tatou Maota nei. E fia maua se avanoa faamolemole sei fai atu se matou upu. E le faigofie lenei mea ua tatou taunuu i ai i lenei afiafi. Toleafoa, malie lou finagalo se i aumai se avanoa se i matou taumafai atu.

**FOFOGA FETALAI:** E manatu le Nofoa i lo le ava fatafata ma lo tatou vafealoai, aemaise foi o le faafogafoga mai a le itumalo, aemaise foi o le atunuu. Ae ona o le tausia o tatou Tulafono Tumau, e i ai lea o le faaeteetega o le Nofoa. O le lafo e le talanoaina, o le itu lena. O lea ua tuuina atu ia le lafo i le Komiti, atonu e faapena ona valaaulia e le Komiti ia molimau, aemaise foi o sui mamalu o lo o faapena ona aafia ma taua o latou suafa e tusa ai o le lafo. Ae ona o le lafo e mafua mai o tatou Tulafono Tumau. Ia afai o lea o le a tatou toe tatala foi se isi foi vaega o le Tulafono Tumau, ona manatu lea o le Nofoa o le a tele foi le lavelave ma le umi o le tatou galuega. E i ai le manatu, Laauli o oe o le tagata e faamoemoe i le Alii lou finagalo e faapena foi le finagalo o le Malo, e le faapea o ai ua le faamoemoe i le Atua, a o tatou uma e faapena. E i ai le manatu o le finagalo o le Malo, e afua mai ona o le tatou le mafuta i tatou Fonotaga.

**Susuga Hon Laauli Polataivao Leuatea:** Ioe, e tautala lava ma le faaaloalo. Toleafoa ou te tulai atu ma lou ava tele. E le taugofie le faaiuga lea ua fai ia matou. O lea foi e tapuai le atunuu. A e le i velo le tao mulimuli lenei Toleafoa i o matou tagata, o lea matou te tatalo atu. O lea o le a faaiu le taulaumea ma loifogafoga maligi le tatou mafutaga Toleafoa. Ni a fa au, lou finagalo, aumai so matou avanoa

faamolemole, ua matou tatalo atu. O lea lava ua leai so matou leo ae sao lele le lafo faalele. O la e i aao o le Afioga i le Palemia le pule aoao e fai ai so o se mea i o matou tagata. O le a taitai faapagota la faapenei matou, e fai le faaiuga a le Palemene, leai so matou leo. O le ala lea o le matou tatalo atu Toleafoa, O ataata fasia nei ua matou talosaga atu ai. Faamolemole o la e tapuai le atunuu, sina matou avanoa ona fai lea o o outou finagalo.

**FOFOGA FETALAI:** O lafo faapea e le tatau ona talanoaina, ona fai i ai se felafolafoaiga. E ui lava ona o lea ua molia i le malu o le tai taeao lo outou toa-fa, tulou i sala le gagana o le upu e foi mai i le Nofoa. Ae o uiga ia o mea, ua manatu le lafo e ao ona tuusao ma taua suafa, ona o latou afioga o lo o faapena ona fitoitonu i ai le lafo. Ona ou manatu lea ou te toe tatala le avanoa, o le isi 2 aso tatou te talanoaina ia le mataupu lea. Ona ou manatu lea, o taeao e i ai le faamoemoe e fai ai le sauniga e auai mai ai le susuga i Le Ao mamalu o le Malo, e faapena ona fai le sauniga e faataape ai le tatou Paeaiga ma le tatou Palemene. Ina ia paleni taimi ma tulaga faapena, o le ala lea e mafua ai ona ou tautau le mau Laauli

**Susuga Hon Laauli Polataivao Leuatea:** Ia ua foi so matou lagona. Toleafoa, e le aoga ona matou toe nonofo atu iinei, matou te nonofo atu fua o matou o Ae. Ua faaiu ai faapenei le tatou Nofoaiga i ni puapuaga ma ni faigata, o lea foi o le a matou toe amo. E ui o lea, o le a folo ona e ava atu i lau faaiuga ua fai. La e molimau ma faafofoga mai le atunuu i lenei aso, talofa e, talofa e, na o le gata e fasi ae pupula. O le ala lea o le matou tatalo atu, ae ui lea o le a foi so matou lagona. Ma le agaga faaaloalo.

**FOFOGA FETALAI:** E i ai le talitonuga o le Nofoa, na ona ou faapea lava i le tulaga o se manatu ua maua e le Nofoa i lenei taimi. O se taumafaiga ina ia faapena ona poupu ai le mamalu o le Palemene ma ana Fonotaga i le lumanai. E pei o se lagona lea. O lea e matau atu, ua tofa i le Atua lou finagalo, e i ai le manatu, e faapena ona tatou sailimalo. Ae momoli atu le faafetai ona o lou finagalo faapalepale. O lea ua e amanaia foi se manatu vaivai o le Nofoa. E le tau selu atu Laauli, e leai e le tau faafuluina i se lagona a o se upu. Ae malo faafetai. E i ai le manatu, o le a lafo ia i le Palemia se i fai sana saunoaga e faaiu ai le tatou galuega ma le tatou felafolafoaiga i lenei aso. O tulaga masani, aua o taeao, e leai se isi o tatou e toe lauga taeao, o taeao e afio mai ai Le Ao o le Malo e fai le sauniga aloaia e faataape ai le tatou Palemene. Ae tapa ma le faaaloalo lau Afioga i le Palemia, e tulai mai i sau saunoaga e faaiu ai le tatou Fonotaga, faa-Taitai o le Maota, faa-Palemia, e faaiu ai le tatou galuega.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i

le Fofoga Fetalai, faapea le mamalu o sui usufono o le Fono Aoaofaitulafono. Ua tatou toai taunuu nei i siui o le tatou toe tauaofiaga o lenei Paeaiga o le Palemene, o le Malo Tutoatasi o Samoa. Taea aena, ona tapunia aloaia lea o le Palemene lenei e le Afioga i Le Ao mamalu o le tatou Malo, le Afioga ia Tuimalealiifano Vaaletoa Sualauvi II. I sauniga faale-Malo i Tiafau nei, o le malae o le faautugatagi aua le sailigamalo o Samoa.

E faamalo le galulue i lenei tausaga 5 tausaga o le Paeaiga. O le anoano o le mau luitau sa feagai ma i tatou uma. I le tatou folauga faaumiumi i lenei 5 tausaga. Ae le i vaivai ai le agaga finafinau, e le tauiso o le malosi lilo o talosaga. Ae a le faanonogamanu o le auaifaluga Paia a le Atua. E faamalosiau pea i taimi e tofotofoina ai i tatou uma e le alii o le lalolagi. E eseese o tatou talitonuga, sa lagonaina pea ia iuleo ia tatou felafolafoaiga. E le gata i totonu lava o le faafaletui a le Vaega po o le Pati, o lo o tu i le foe o le sa o le Malo o Samoa. Ae faapena foi ia outou afioga o lo o agai le Malo e ese ai ma le agai faalotoifale a le Vaega e toatele o le HRPP. Aepeitai e tasi lava le agaga tausili e le tauiso, le alualu i luma le atinae manuia o le tatou atunuu. Ua tatou masani ia tatou upu faa-Fonousu i le malae lenei, o le sailigamalo i Tiafau nei. E le milia faauu, o lagona ma le maai o lafolafoga, o le a lava le tetele o pesega ae matua lava i le o o. Aisea? Ua fesautai gafa o Samoa, e le sese ai le mau a Samoa, o le aiga, o uso tuofe i ona faleupolu, e uso tuofe foi i ona tupu ma ona ee.

O se uiga matagofie lea i le faatinoina o tatou Fonotaga, i le agaga fesutai faatamalii, e talitalie e taunuu ai lava i le agaga taugamalie, i nisi o faaiuga e ui ina faigata. Ae ua faafaigofie ona o aga ia ua tatou masani ai, i feiloaiga faapenei, i fonotaga foi faalenuu. I le avatu aumai, o uiga ia e ese ai lava Fonotaga faa-Palemene a Samoa, ese Fonotaga faa-Palemene a isi Malo faa-Taupulega, ona e lualuagia a tatou fefaasoaiga i manatu i tu ma aga faatamalii faa-Samoa moni.

O le isi lenei o Paeaiga ua maoae matatia ua ia ausia, e mafai ona ou auiliiliina puupuu faapenei. 1. O le tuuina lea ma faatumau i totonu o le tino po o le fatu o le Faavae o le Malo Tutoatasi, o tatou talitonuga i le Atua, le Tama le Alo le Agaga Paia. Sa i fafo o le Faavae o le Malo Tutoatasi o Samoa.

2. O le aloaia o le tuu loa i totonu o le Faavae, o aia tatau a alii ma faipule ma latou pulega i totonu o nuu, ae faatino i le faaaloaia loa i totonu o le Tulafono Faavae o le Malo, le Faamasinoga o Fanua ma Suafa. O se miti na faailo e tama o le Faavae i le Fono Faavae o le 1960. E tuu mai aiaiga nei i se Palemene o le lumanai latou te faatinoa, o lea ua faatino lo latou finagalo faaalua e le Palemene lenei.

3. O le faataoto o se fofu tumau, a o se taiala foi mo le fetuunai faifaipea, o tuaoi faafaiga palota i le tuputupu ae pea o le faitau aofai o tagata o itumalo taitasi. Ma le agaga ia i ai se fua, e tau faalaugatasia ai le faitau aofai o tagata i totonu o itumalo faapalota, i le tulaga o sui faipule o lea itumalo ma lea itumalo. O se faiga fetalai fetuutuunai lea, e pei foi o isi tuaoi, faale-Malo o tautua po o faiga faale-Malo. E pei o



tuaoi faa-falemai, o tuaoi faa-ofisa o leoleo i nuu i tua. E fetuutuunai lava e le Malo mai lea taimi i lea taimi.

4. O le tapenaina i faamaumauga o talatuu faapea foi ma tala faasolopito o le Palemene lenei, i ana Galuega ma Faiga Faavae i Nofoaiga uma mai le 1962 seia tau mai i le taimi lenei. Na amata tapena e le Failautusi o le Fono Aoao Faitulafono, le Afioga ia Fepuleai Atila, a o avea ai ma Failatusi Aoao o le Fono lenei. Ma faamaea ai e le Failautusi o i ai nei, le Afioga ia Tiatia Tualaualei. Ae tuufaatasia e Dr Iutisone Salevao. O se galuega ua atoatoa ona tapena, i le gagana Igilisi mo le faaaogaina loa. E fanau aoga o lo o tau saili mai, saili mai pea lava pea faamatalaga mo a latou suesuega o Talatuu a le Malo o Samoa ma le Palemene. E taua ia latou aoaoga, muliai ona faamaea lea o le faaliliuina i le tatou lava gagana.

E ese ai ma matatia iloga nei e 4, ae faapea foi ma Tulafono, Tulafono nei na tafafia e le Palemene lenei ua pasia. Mai le 2016 se i tau mai i le faaiuga lenei 2021. O le 2016 na pasia ai Tulafono e 19, 2017 na pasia ai le 28 o Tulafono. O le 2018 e 16 Tulafono, o le 2019 e 19, 2020 e 25. O le 2021 e 7. Aofaiga o Tulafono na iloiloina ma pasia e 124.

Ona faaopoopo lea i ai, o pepa ma lipoti faa-Palemene sa lauliliuina ma faamaonia. O le tausaga e 2016-2021, Lipoti o Komiti faa-Palemene e 382, Lipoti faale-tausaga a Matagaluega ma Faalapotopotoga a le Malo e 416. O le aofaiga o Lipoti a Komiti faa-Palemene ma Lipoti faale-tausaga a Matagaluega ma Faalapotopotoga a le Malo na tagofia e Komiti faa-Palemene i lenei 5 tausaga e 798. Tuufaatasi ma Tulafono ua pasia, 922. O se galuega tele sa feagai ma le Maota lenei.

Ua opea i le Maota lau Afioga i le Fofoga Fetalai, le faamoemoe e pei ona faailo i le Maota lenei lou faamoemoe o le a e malolo manumalo lau Afioga Leaupepe. I le maea ai o le 30 tausaga o le tautua i le Malo. O ni tausaga umi, e ala i le tofi o le faauluuluga o le Palemene lenei. O le tofi o le Fofoga Fetalai, ae sa e tauavea foi le tofiga o le Minisita o le Kapeneta i se tasi o Nofoaiga. E manatua pea lau taitaiga, ae a le tau faatoatoa o le Maota nei, i lau taitaiga i ou uiga malie, i lou siufofoga malu.

O suaga faatamalii e malie ai le loto ita, ma le loto tiga, e soiso ai lava le isi sui usufono, ua fiafia, ua malie, ma le pelu ua featiai faafia ai. O se aoaoga lelei mo le isi, o le a nofoia le Nofoa lena, ia manuia tele lau malologa manumalo.

Le Afioga ia Aeau, ua oo atu upu faamanuia i lou faamoemoe, o le malolo manumalo mai i le Maota nei. Na ona ou fono faapipii. Sa e nofo Aeau i i le Nofoa o le Fofoga Fetalai i le tausaga e 1988 i le 1991, o le sui usufono o le Faigamalo o le HRPP, na mitamita ai lou itumalo i lou faafoefoeina o le Fono i lou lototele ma le tofamamao. O se vaitau tele lea i le malosi uiga ese, o le pati agai o le soofaatasi, faatoa malolo le tauavea sa o Samoa i le 1986 ma le 1987.

Ae sa e faatoafilemuina le Maota, i na vaitau i le anoano o sui usufono auai i Fono po, a o lo o faasua-ava, ma taofiofi gata. Faamanuia le Atua i nisi o tiute o le a feagai ai ma lau Afioga.

Lau Afioga Tuitama, ia faamalo le galue, e le gata i le Matagaluega o le Soifua Maloloina ae faapea foi ma le Matagaluega o Tina. Sa e faaoga lelei lou tomai faa-fomai, maua foi agavaa faamatai i feiloaiga ma nuu aemaise lava i lou tofiga o lo o e tauavea nei.

Malamalama lelei foi le Kapeneta i lou tomai faa-leiloga faa-faifaatoaga, e mafai ai ona tasi se ituaiga mago e mafai ona e toto, ae faafua mai ai ni mago eseese e 10, o mago lapotopoto, o mago laumiumi, o mago susu ma mago mitimiti, ia saga fua tele au taumafaiga.

Faasootauloa Pati, o oe lava o le toe ulutaia o le Maota lenei, ou te maofa pea i lou soifua pito matua, o le tagata pito matua lea o le Maota lenei, ae talavou pea lou siufofoga, lou malosi faafouina, lau amio, ma lau vaai mamao. E le taumate o lo o ia te oe, se meaalofo lilo, e te le o faailoa i ou uso a sui usufono, o lo o moomoo foi, ina ia soifua pei o oe ma sau tuualalo i metotia o lo o e faaogaina, ina ia e ola faavavau ai i le parataiso i le olaga nei. Ia tumau lou malosi faafouina aua fuafuaga au i luma, o le malologa manumalo.

Ua oo foi faamaisega a le Maota i le faletua ma le aiga faanoanoa, i le tuua o le Malo i lo tatou uso a sui usufono ia Vaafusuaga Toleafoa, o se mafutaga ua motusia faafuasei. O se faamanatu ola, o le tatou ola e puleesea. E ao ai ona tatou tapenapena, tatou tapenapena mamao ona o le valaau paia a le Atua, e sau faatagata gaioi i le ligoligoa o le po. O le tatalo, ia maua sona nofoaga mau i le Ola e Faavavau.

Ou te fia faapai foi e faafetaia le tapuaiga le leoa a le Ao mamalu o Le Malo, Sui Tofia faapea foi le paia o le Faamasinoga, ae a le faafofoga mai o le paia o Aiga ma a latou Tama, tainane Tumua ma Pule, Ituuu ma Alataua, Aiga i le Tai ma le Vaa o Fonoti. Ae matua lava le tuu i le aufaigaluega paia a le Atua, i le mana o la outou talosaga e manuteleina ai faiva o le Palemene, lenei o Samoa.

Faamuli ma le ai se upu faaii, e faafetai ai i le aufaigaluega a le Malo, o Ofisa Sili o Matagaluega ma Faalapotopotoga a le Malo, o outou o le malosi o le Malo i outou tomai, o taleni, o poto masani ma agavaa eseese, tou te fautua, tou te faatino foi galuega uma ma atinae eseese i le loto faamaoni, le lotomau, ma le le manatu faapito mo le manuia au i luma o Samoa. Ia sagai ane ai o le tai, ia faaosofia moegaluaga, ma ia utupupuina la outou tofa, aua le tautuaina o lo tatou Malo, ma ona tagata.

Faamalo foi i lau Afioga i le Failautusi o le Fono Aoao Faitulafono ma le aufaigaluega i tapenaga uma e sologa lelei ai taualumaga o a tatou Fonotaga i le faaloaloa, ua i ai nei i le tele o mataupu lavelave, ua oo i ai Taualumaga o tatou Faigamalo i nei onapo. Faafetai foi i le au faasalalau, ia faapea foi ia alii ma tamaitai o le Malu o le Malo i le leoina o le tatou Maota nei. Manuia tele ia lo tatou alofaiva i faiga palota a lo tatou atunuu.

Lau Afioga i le Fofoga Fetalai, ma le mamalu o le Maota lenei, soifua ma ia manuia.

**FOFOGA FETALAI:** Ua logo faafofoga le Palemene, aemaise foi o le faafofoga tapuai mai a Samoa, i le saunoaga matagofie a lau Afioga i le Taitai o le Malo i lau Afioga i le Palemia. Malo malele, malo saunoa faa-taitai, malo foi faa-tama o le atunuu.

Ia matou te le selu atu, o le saunoaga ua talafeagai ona e malele ma e saunoa i itu aso faapenei, ma le tatou taimi o lenei Paeaiga lona XVI. Ia ona manatu lea, malo saunoa ua malie taliga e faalogo, ae e i ai le manatu i le paia o le Palemene, ia ona e ta te le i lauga lava e fai sata upu e molimoli atu ma e ou te manatu foi e leai se isi avanoa, o taeao e afio mai le Ao o Le Malo, e tapuni aloaia le tatou Palemene, o le tatou Nofoaiga lenei. Ia ona faapea lea, ia leaga o lea e tulai mai ia le Susuga i le faifeau, le Susuga o le... ia o le tofi foi o Anoomaa Sasae, ae i tulai mai lau Afioga Alaiasa.

**Afioga Alaiasa Muagututia Moefaauouo Malagaitutogiai Sepulona Moananu:** Lau Afioga i le Fofoga Fetalai, e tele aso, tele taeao ae le lauaso, e le lautaeao. O le aso foi ma le faamoemoe, ia ua faiva ese foi Lopepe. I le matou foi nofonofu atu ma le matau, leai o aso faapenei e le nofonofu vale ai se i tulou, le faleupolu ma le Usoga ia Tumua ma Pule. Leai o nei, o le magavai lenei ma le punavai lenei, o le tu ma le aganuu a Samoa.

A malele ma saunoa Taitai o atunuu ma tupu ma tamalii, e ao lava ona fai se tala a faleupolu. Ae ui i so matou naunau lau Afioga i le Fofoga Fetalai, e ui i so matou naunau i taeao faapenei, ia ae ta liu lava ae popoe. O lea ua e saunoa, ua e tatalo mai, ia, ona matou faapea lea, tailo i ai i se finagalo o le Usoga ia Tumua ma Pule, ae ua o matou manatu, o le a matou faia le faiva o le tapuai. O le a matou tatalo ma tapuai, ae lafo atu ia e Tootoalii lo tatou taeao ma lo tatou aso, e agai ai le saunoaga a le Taitai o le tatou Malo.

Ia o le matou tulai atu lea ma le agaga mauualalo i lenei vaega o le afiafi. Ia o ou mama na, ia lele malie lau saunoaga ma lau tuleiga, ia pale feagai ai aua foi le malelega a le Tama o le atunuu. Ia alofa mai le Atua i lenei afiafi. Ia manuia le faaiuga o le tatou Fonotaga.

**Tofa Namulauulu Sami Leota:** Lau Afioga i le Fofoga Fetalai...

**FOFOGA FETALAI:** Malo, e le asoaina, pe pale, ia ae teu lava i le va o le loto ma le fatu ma le mama e pei o lea muagagana. Ia o le mea la lea, ia o lea ua tulai mai Namulauulu, ia o lea...

**Afioga Tafua Maluelue Tafua:** Lau Afioga i le Fofoga Fetalai...

**Tofa Namulauulu Sami Leota:** O lea ua taoto lava i paga le tia o le Tautiaga i le faatamasoaliiiga i le aso, ua taliga foi e fia logo le mauga o Matautia i le malelega ma le saunoaga a le Tama o le atunuu, Taitai o le Maota. E moni lava Lufilufi, o aso nei o aso o upu, leaga o le Maota o

Samoa o le Maota e lipoi ai upu o le atunuu, e malepe ai foi upu o le atunuu.

O lea ua matau atu, o nei mea uma e liolio i le faaaloalo ma le... e tatou te tiu i o tatou mamalu ma o tatou paia, ae ogatotonu le faaaloalo. Ma e matau atu ua lafo e Lufilufi aua oe le tama matua, e fasi ma sui o le Palemene e talifuitau i le Afioga i le Palemia, ia sa i ai le manatu e fai atu se faamatalaga a le Itu Agai, ae ui i lea, leai. E tumu lava i le faaaloalo lenei itu o le Maota.

Ia o lea la e faapena se manatu o Safotulafai, leaga o le Pule matua, Pule taitai, Pule faavae. Ioe. O le a taatia atu e te talifuitau o lau pale feagai lea, le Afioga i le Palemia, sau se taimi sau se taeao, ia lea e matou malolosi, e matou te omai foi i lea Paeaiga, ia tatou faifai vaa lea. Faafetai Lufilufi.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, masalo sa nofonofo lava lenei itumalo ma tau matau iu o saunoaga o lenei afiafi lau Afioga i le Fofoga Fetalai. Ina ua malele le Taitai o le atunuu sa tau matau lava le sui usufono lenei o le Vaimauga, leaga o matou nei e vaaia ma tu ai le tulaga lenei i le Maota Fono. A o le amata e Lufilufi o na e sese, e te le amataina se faatau, oso mai ma oe lea Pule, leai o nei i Tumua... ona i ai lea o le manatu i lenei afiafi, ua faiva ese foi Lopepe. Upu a le atunuu ua tatou i ai i le toe aso nai Moamoia.

Ae matau lava e te le toe lauga Lufilufi, o le Tama Atua lea e tu i malae e taitaia le sa o le atunuu. O lea sa mamalu ai le sa i le Tama Atua ma le teine Atua, o lea sa see lava le sa ae o lea e faapena.... A o lenei ua ou tulai atu lau Afioga i le Fofoga Fetalai, o le malie atoatoa o Leulumoega ma nisi, o le a faaaloalo atu Tuisamau i lau fetalaiga Pulemagafa. O taua lava o le Vaimauga lena, o tatou o Saleupolu ma Tuisamau, ua ou faaaloalo atu i ai. Ua faaaloalo atu e te faia se tootoalii i lenei afiafi, i le Tama Atua o lo o tu i le foe o le atunuu.

Ia ma lou agaga faaaloalo.

**FOFOGA FETALAI:** Ia, Lufilufi e...

**Afioga Alaiasa Muagututia Moefaauouo Malagaitutogiai Sepulona Moananu:** O lea o le a faaifo lava le Paeaiga ae o le a toe nunu lava le toau o ufi i le tulaga lea ua. E na o Fata lava ma Maulolo e feagai ma Lufilufi, pau lea. O le mea lea, ae leaga ou te alofa i le uso nei, te i ua ou talatala i tua, leaga ua alu le tausaga o faatusatusa lava ia Lufilufi ma Tuisamau. Leai e eseese, e eseese mea ia, Tuisamau ia e vaai i lo ta va. O lea ua ou avea le faaaloalo i lo tatou Tama, tatou alu ai i lena. Ia ma le agaga faaaloalo.

**FOFOGA FETALAI:** Malo, faafetai faatoeaina. Ia tulai mai le Tuiatua faanofonofo...

**Afioga Tafua Maluelue Tafua:** Ia, faafetai Lufilufi, faafetai foi Tuisamau. O lea e matau atu i lenei afiafi, sa ou faapea lava au, o tatou e i le agaga foi lea o le faaaloalo ma le faifai matua le tatou afiafi. O lea lava sa ou musumusua ia Faumuina Liuga ma Lauofo, o le a ou tapuai ae fai e oulua se tatou upu, o tama matutua o le Palemene. E felafaoai faapena le tulaga o le tatou va nonofo ai ma le tatou vafealoaloai.

Ae o le ala lena o lou tulai atu, leaga o lea ua lafo mai e Lufilufi ma Tuisamau le lauga, ia o le a ou tu atu e fai le faatau a le aualii ia, lafo atu ia i lau Afioga i le Fofoga Fetalai, ma le faaaloalo lava.

**Tofa Ili Setefano Taateo Tafili:** Lau Afioga i le Fofoga Fetalai...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai...

**FOFOGA FETALAI:** Tulai maia oe le matua lau Afioga Fonotoe, Lauofo.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, ou te manatu e tataua ona ou tulai ona o lea e ma te sootuli ma le Tofa i le Matua. O Tafua ma Lauofo o Tootoo o Lalogaafua. Sa manatu lava Lufilufi ai o le a e faapai mai muamua. Silasila, o le lona 4 ai lea o faaiuga o Paeaiga o ou saofai, maua ma le toeaina lea.

Sa ou manatu lava o le a faifai matua e pei ona fetalai le Tofa i le Matua i lo tatou aso. Ui i lea, e le faia so matou loto, ae i lo tatou va nonofo ai, ma le tatou va o tootoo o Tumua ma Pule, o lo o manino mea uma e leai se mea o pogisa. E leai lava se mea o pogisa, ioe. Ae o le taimi muamua foi lenei i le fa Paeaiga o ou saofai i i faaiuga o Paeaiga.

O lea ua lafo atu i lau Afioga i le Nofoa le faaaloalo, talifuaitau aua le saunoaga matagofie a le Taitai o le la Itu, le Afioga i le Palemia. Ia ma e o le masani sa ou matau e au, o le saunoaga a le Taitai o le Malo, o le saunoaga lava lena a le Pule Faatonu. O le Kapeneta ma Minisita Lagolago ma le la Itu o le Malu. A maea, ia ona lafo mai lea se i fai se faatau i lenei Itu o le Malu. Ia po o fea e taoto i ai le tofa ma le faautaga.

Ia a ua ese lenei aso ma le tatou taeao liugalua. Ui i lea, ona o lea lava sa ou nofonofo, ou fai atu i le Tofa i le Matua ma le Afioga Faumuina, fetalai a Tiatia, o le fofoga o le Aiga Salemuliga, se i tau faalogologo po o fea e agai i ai le tofa a le Afioga i le Fofoga Fetalai, ona o lea ua lafo ai i o. O lea foi ua lagolagoina e le tootoo o Fuifatu, Puleono ia faapea foi Tuisamau. E ui i lea, afai o le tofa lea, ia o le a matou tapuai.

Afai e te finagalo e lafo mai, e matou te augofie lava i so o se mea. E le faia so matou loto, o le Maota e pule ai lau Afioga. O le matou faapai atu lea ma le agaga faaaloalo. Ia ona o lea foi e pei e tauolioli mai le

Afioga ia Faumuina le Tofa Tiatia, ia se i aumai muamua le tofa mai i o, se i tatala mai le tofa, a faapea la e lafo mai i i, ia ona fai loa lea o se ta tala e faaiu ai lo tatou aso.

**Afioga Hon Faumuina Tiatia Faaolatane Liuga:** Faafetai lau Afioga i le Fofoga Fetalai e aumai pea le avanoa. Sa ou manatu e fesili mulimai ia muamai. Ia ua le tausia foi lo tatou vatapuia, o toeaia o le Maota.

Lau Afioga i le Fofoga Fetalai, o lea ua saunoa le Taitai o le Malo, o le tama a Tumua. Ae o lea lava e tapuai Pule.

Ia, ae lau Afioga i le Fofoga Fetalai, o paia o le atunuu ua malu tauave i Mulinuu nei i le mea o i ai le Malae o le faautugatagi. O paia o Fufatu, Vaituutuu, Finao, Matia ma Matia Ituau, Vailoa ma Faletoi, ua i inei. O Lalogafuafua ma Sepolataemo, Malie ma Vaitoelau faapea Maauga ma Nuuausala ua aofaga mai i Tiafau nei.

**FOFOGA FETALAI:** O lena ua e amata le ta lauga...

**Afioga Hon Faumuina Tiatia Faaolatane Liuga:** O lea ua i inei, ae o lea ua fetalai, leai se i fai atu pea, o lea ua uma le taimi o le Fofoga Fetalai ua le o toe faaaogaina tulafono i se tatou faatau.

Ia e pei o le tala lea a Tiatia, ia po o Toluono foi lea e fai atu. O le tootoo o Vailoa e tausii ai le malae i Vailoa. Ae ui lava i lea, afai o lou finagalo e te fia saunoa ona leaga o lau toe saunoaga lea. E sau pea ia o matou taeao, a e uma sau, ia ona fai atu lea o sina matou upu e faafetai ai i le Taitai o le Malo, ma lou faaaloalo.

**Tofa Nafaitoa Talaimanu Ketii:** Malie lau Afioga i le Fofoga Fetalai se i taumafai atu se matou foi faamatalaga, leaga o lea ua soo taia. O oe le tama matua Saleaula, Faasootauloa, o lea lava e tapuai Matautu po o le a le taimi e tulai ai lau Afioga. Leaga o lea ua e malolo manumalo, laina tutusa oulua ma le Afioga i le Fofoga Fetalai. O upu a le atunuu e uso lava taa ae talanoa aualuma, ia faafetai. Leaga e matua ia Vaituutuu i le Falefagamalo, o le ala lena o lou... ae fai sau saunoaga.

**Tofa Hon Faasootauloa Pati Taulapapa:** Ua leva lava ona ou fia tautala atu. O le ala lena o lou tulai atu ma le faaaloalo. Sa ou manatu lava, po o fea o i ai le tofa? Lufilufi ma Leulumoega, leaga e le gagana fua. O Saleaula o le Pule faavae. O lea foi e i ai ia le tatou mavaega ua uma ona fai. A tatou omai i Tumua nei, e te gautaala, a o gataiala. Leai lava ma se mea e sese.

O le mea foi lea, se e tumu i le faaaloalo, pe tasi pe lua se tala a Saleaula e fai, e faapena le tulaga. O le mea lea, lau fetalai i le Fofoga Fetalai, lafo maia, lafo maia le taeao. Leaga ua leva ona faatau, ua leva ona fetuunai, ae o lea lava e tou te nonofo ma le faavae o tatou. E le Palemia i inei, toe lauga outou. Ae o la e matou te vaavaai mai i o. O le mea lea na ou talanoa atu ai...

**FOFOGA FETALAI:** Saleaula, Saleaula...

**Afioga Fuimaono Teo Samuelu Teo:** Lau Afioga i le Fofoga Fetalai, e manatu lava se i fai se matou tala, i see lou sa. O le faamanuia...

**FOFOGA FETALAI:** Na outou faafofoga i au uluai upu, sa ou faapea ua i fale matega.

**Tofa Hon Faasootauloa Pati Taulapapa:** Toleafoa, ua uma sou manatu. Lauga loa oe e faauma le mea. Lauga oe, aua le toe...

**Afioga Fuimaono Teo Samuelu Teo:** O le ala lena o le tulai atu, e faamanuia i lau lauga.

**Tofa Ii Setefano Taateo Tafili:** Lau Afioga i le Fofoga Fetalai, ia manuia le lauga a Aana, faafetai.

**FOFOGA FETALAI:** Faafetai.

**Afioga Fuimaono Teo Samuelu Teo:** O le a matou tapuai, fale tapuai ae alo i ou faiva. Sa ou manatu lava e faalava loa le amoa, ua tataua ona mateia e faleupolu. Leaga e i ai aso ma ituaso e sasau ai le fuesina, e lolo ai le fueafa, ona manatu lea, o lea lava ua faatele le faatau, ia ae malele lau Afioga, ae ua talafeuga, o le lasi Nofoaiga lea o lea o le a tatou faamavae.

Ia manuia le lauga. Tapuaia ou faiva.

**FOFOGA FETALAI:** Ia, malo faafetai.

**Susuga Mulipola Leiataua Laki Mulipola:** Lau Afioga i le Fofoga Fetalai, ia leaga e tele aso ae le lauaso. E tele foi taeao ae le lautaeao. E ua taatitia upu a lo tatou atunuu. O Samoa foi ua uma ona tofi, ia ae e le nofonofo foi i le taeao ma le mea e tupu ai.

Ae i ai le talitonuga lau Afioga i le Fofoga Fetalai, leai e manatu lava e maua lava le pulou o lo o e pulou ai. Ae o le agaga ma le faamoemoe e leaga e le velo fua le tao e pei o le tala e fai i le tologa, e faapena se naunautaiga o le tulai atu. E na ona matou faapea atu, manuia lau lauga, aua e te le manuia ia le tofa lea ia Tumua ma Pule, ou te iloa o lea faatoa manuia lau lauga ona ua ou faamanuia atu lau Afioga. Ia lele malie lau tia, leaga o tala e fai i alii seu ma lana upega seu, ia e fetuutuunai muniao. Ia manuia tele lau tofa.

**SAUNOAGA TALIFUAITAU A LE FOFOGA FETALAI**

**FOFOGA FETALAI:** Ia malo faafetai, e le tau selu atu ia le tatou Palemene, aua e i ai le manatu o lea sa ou avatu le lafoga i le amataga. Ia ma e moni a outou. Ioe, e faapena ona faitau pea i le tulaga masani. A maea lea tausaga ma lea tausaga, ia ona tuu atu lava lea i le tatou Palemene, ia saausi le faatau a Tumua ma Pule, ia ma aiga.

Ia ae tapuai lava ia le Fofoga Fetalai, e pei e faapena ona o le tatou aganuu. Peitai o lenei tauafiafi, e faapena se lagona, sa ou tatalo atu lava ma le agaga faaaloalo, ia o a fa lafo maia se i ou taumfai aua e le i faia lava sau upu talu... ia ona faapea lea ai ua i fale ia le matega, ae tele mea e tatau ai ona ou lauga.

Ae o le a ou le avatua i luma.

Ioe, leaga na uma loa na fau e le Atua Atamu ma Eva, fau Satuala. Ia, ae ou te le faamatala atu foi ia faiva alofilima o le usoga ia Tutuila ma Ape. Ioe, o le mea la lea, ia taoto ia mea. Ioe se e ta te musu e toe ta i tua le tili. Ioe, ae o le mea sili ua saausi, finagalo malie le tofa, ia lafo mai aua o lau faafetai i le tatou Palemene.

Ioe, lau Afioga i le Taitai o le Maota, ma le Kapeneta, ia le pulou Faa-Palemene, malo galulue, faafetai. Ua leai se vailiu ua faapena ona le i oo i ai le atinaeina o le atunuu. Talu ai ona o le faiva alofilima o le Palemene i le liliuga o le tofa ma le faautaga e saili i le Atua lona finagalo. E a tatou e saili, faalagolago i le Atua, o lona faiva alofilima o le faatino. Faatino la le tatou galuega lea na fai o le tatou fonoa o le Fono a le atunuu.

Ia o le faafetai mo tatou galuega fai ma le tiute. Ae o le faafetai sili e ao ona avatua i lenei taimi, o lo outou faatuatuaina o au. Ioe, e faafetai atu i lau Afioga i le Palemia ma le Kapeneta ma le Palemene. Faafetai mo lo tou filifilia o au e avea ma Fofoga Fetalai. Ia, o lea ua outou aumaia le faaeaea, ia a tatou le galulue faatasi e le malu le Nofoa. Ae ona o lo outou faaeaea, ia o ai le tagata ua o outou manatu mai ai? O lea ua mafua ai ona toamalie ia le tatou galuega ona o lo outou faiva alofilima o lo tou faaaloalo. Ia malo faafetai ia e le paleina, ae teu i le va o le fatu ma le mama ia le tulaga o lo o i ai ia lo outou agalelei ma lo tou faaeaea e ala i lo outou faaaloalo. Avea ai ma Fofoga Fetalai, ia le sui usufono o le nuu o Fasitoo-uta.

Ioe, avea foi lenei avanoa ou te faapea atu ai, ou te faamalulu atu. O le a se upu pe pao papa pe sopo tuaoi, ia pe taugalemalie foi i le faafofoga, ia tofa i le Atua, ia potu lava le tautai ae le atoa atu i lona vaa, ia ia i lona sa. E faamagalalo foi se upu a le Fofoga Fetalai, ia ona o le agaga lava ia faapena ona tatou toamalie ia aua le tapuaiga a le atunuu. O le mea la lea e momoli atu ai le agaga faamalo ma le agaga faafetai.

Faafetai i le Ao o Le Malo ma Sui o le Fono a Sui Tofia, aua o le Faa-ao o le Palemene i le latou lagolago mai ma le amanaia o le Nofoa, o le Fofoga Fetalai, i se tiute ua faapena ona faatino. Ia, i le Afioga i le Ao mamalu o Le Malo, ma le Sui o le Fono a Sui Tofia, o le paia lava lea o le Tafatolu o le Malo.



Ia e faapea le Afioga i le Faamasino Sili, Peresetene, alii ma tamaitai o le Faamasinoga, ia e faapea foi le Pule Faatonu i lau Afioga i le Palemia ia ma lou auvaa i le Kapeneta ma Minisita Lagolago. Malo faafetai i lo outou faaeaea i le Fofoga Fetalai. O lo outou paia lava e le popo i se matou tala. Ae o le agaga moni e matou te faamalulu atu i le faafofoga a lau Afioga i le Ao mamalu o Le Malo, ma le Sui o le Fono a Sui Tofia, ia aemaise o le Tafatolu Fefaatauagai a le Malo, ia i se galuega ua le atoatoa ona fai. Ia faamagalo le auauna.

O le paia lava lea aua Aiga ma Tama, Tama foi ma Aiga, le Usoga a Tumua ma Pule, Ituau ma Alataua, Ituau ma le Vaa o Fonoti. E i ai le manatu o le a ou le oo i itu ia, ua uma ona malele ma saunoa i ai le Palemia, faapea foi Tutuila ma Manua i le latou foi Faigamalo. E faapena ona latou tapuaia o tatou faiva e faapena se lagona.

Ae faapuupuu se tala, aua e i ai le manatu ua lava ma totoe le saunoaga a le Afioga i le Taitai o le Malo e sula ai le agalelei ma le alofa o le Atua, aemaise foi o lo outou faiva alofilima. E i ai le manatu e fia faafetaia foi le ma va galulue ai ma le Sui Fofoga Fetalai. I le ma galuega e faapena ona ma fetufaai. Malo alii uso i lo oulua lagolago mai. O le tatalo lava ia manuia lo oulua alofaiva aua le faiga palota aoao a le atunuu. Ia faaifo mai ai i lagi aua le faamoemoe o lau Afioga i le Sui Fofoga Fetalai.

E fia oo foi se faamatalaga i Ofisa Sili o Pulega o Matagaluega, e ui lava ua maea ona saunoa ma malele i ai le Afioga i le Palemia, ae leaga ta te le i lauga lava ma taua, e na o lou tatalo lava ma talosia a o le faamanuiaga. Le paia o o outou mamalu i tupu ma ee, o Ofisa Sili o Pulega o Matagaluega ma Faalapotopotoga eseese a le Malo. Malo galulue, o le Atua lava e maua ai manuia, ia faapena ona faalagolago i le Atua e maua ai le malosi. Aua e mautu atinae a le atunuu, o lo outou lagolago ma le auaunaga faifaipea i lea aso ma lea aso, e ala i fautuaga e tuuina mai i le Pule Faatonu a le Kapeneta.

E faapea foi i le susuga i le Failautusi a le Fono Aoao, ma le ofisa o le Fono, malo galulue, o lea ua tali le sua ma taumamafa. E le gata i lo outou aao masui i le taliga o le sua, ae faapea foi le faatinoga o galuega e le faigofie. Ia faamanuia le Atua i o outou faiva alofilima. E a matou nei, a o outou taeao. E le gata i le Failautusi o le Fono, ma le aufaigaluega, ae faapea foi i Ofisa Sili o Pulega ma Faalapotopotoga a le Malo, aua le fia vave faipule, se i afu le tou tautua. Tuu lenei taimi ia matou, e pei e faapena se lagona. E aumai e le Atua lo outou avanoa.

Le aufaigaluega paia a le Atua i Fatafaitaulaga e fia i Taitai o le Tala Lelei ma le aufaigaluega tofofi. O outou lava o lo o faamoemoe i ai le faanonomanu i le ao ma le po i le talosiaina o le atunuu. Ia manuia lo outou alofaiva, aua foi le faapitoa manu ia tasi, o le Palemene atoa lenei, o le Palemene a le atunuu. Ia faamanuia i le Palemene atoa. O le matou foi tala, ia alofagia e le Atua ia maua lo outou finagalo, ia paia la outou upu folafola, ma ia mana la outou tatalo, maua ni agaga se tele auauna i le Atua ma lona finagalo. O le matou tala lea i le paia o le aufaigaluega paia a le Atua.

Ona oo mai lea i si o matou itumalo, Fasitoo-uta i le paia o Satuala ia Aiono ma Leaupepe, o Sua ma Toleafoa ma le taa uso, le mamalu i le falefitu ma le matua ia Tauauvea. Malo tapuai, faafetai i lo outou faaeaea. E lagona lava le mafanafana i le faatinoga o tiute ma le auaunaga ona o la outou tatalo. Le mamalu o le aufaigaluega paia a le Atua i le tatou nuu, malo tatalo, malo le lagolago mai. O ai ea le auauna ua outou agalelei ai. O le matou tatalo, ia faafoi atu e le Atua manu ia te outou ma lo tatou nuu, ina ia manuia lo tatou nuu, manuia le aufaigaluega paia a le Atua, o lo o taase i lo tatou nuu, ona o le molimauina o le finagalo o le Atua.

Ou te faafetai foi ia Faleasiu, ona o le tele foi o le isi taimi na matou....na ma omai ai ma Tuitama mai Faleasiu, ia Faleasiu e, aiga faletolu ma fuaifale, le mamalu o le aufaigaluega paia a le Atua, ia faafetai i lo outou faaeaea. O tatou te mafuaa, ou te i Fasitoo ou te i Faleasiu. O le a le mea e finagalo i ai ou te aoga ai, o la ou te nofo mai Fasitoo, tatou galulue mulumuluau foe, e faapena. O le a se mea e mafai ona ou ono fesoasoani ai, susu atu tatou mafuta ma tatou feiloai.

Ou te le tolaulauina ni atinae, Fasitoo, ou te le tolaulauina. O le mea lena e faitau e oe, afai ua faamalieina, ni atinae ua mafai ona faatino e lo tatou Malo, e faapena, e le i faua Roma i se aso e tasi. Ua outou silafia foi o le faasoa meaai, e faapena. Se tusa lava pe le ai, e faapena le faasoa a le toaina faasoa lima lelei. E faasoa i o, ia taumamafa muamua le atunuu, ae oo lava ia ia, pe ai pe leai.

Fasitoo o lena, a o le a le faasoa ua mafai ona oo atu e le Malo i lo tatou nuu, o la e silasila le Atua, e toe faaopoopo nisi atinae se tele i lo tatou nuu, e manuia ai alo ma fanau a lo tatou nuu. Lelei vai paipa lelei eletise o a uma mea faapena, o mea aupito sili na na manaomia i le soifuaga o si o tatou nuu. Manuia le tapuaiga. O le tatou palota, manuia le alofaiva, faamoemoe i le Atua, sama se mago, tautai se potō ae fili i le tai se agavaa. Tulai mai se tagata, se sui e loto tele, toe loto alofa, toe tautua lotu, ina ia aoga i le nuu, aoga i le ekalesia. O le matou tala lena i le tatou palota, faamoemoe i le Atua lau filifiliga. Manuia foi le faafofoga mai a le loomatua ma tamaiti ma na i ou aiga uma i Samoa nei ma atunuu e mamao, faamanuia le Atua ia te outou. E pei o le matou tala lea. E puupuu lava upu a le tamaloa Fasitoo e faaiu ai lenei tauafiafi.

Lau Afioga i le Palemia, ou mama na, tatou tala soifua ina ia avatu e le Atua lo outou soifua ma lo matou ola, tatou te aulia ai ma le manuia, le aso a taeao. Ua faamoemoe e faataapeina ai le tatou Palemene i se tatou sauniga aloaia.

O lo o pau ia te au le Matagaluega o Leoleo, faafofoga mai lau Afioga i le Komesina ma le Matagaluega. O le Matagaluega e pele i le loto. Ou te le i leoleo ae pele ia au, ona o le latou auaunaga. O le latou soifua e ofoina e tautua le atunuu i so o se auala. Pe fano ai, e tautua, faamanuia le Atua i le lau Afioga i le Komesina ma tulaga tofi, ma le mamalu o le Matagaluega o Leoleo.

O le matou tala lea ma le agaga faaaloalo, manuia lenei tauafiafi ma le faaiuina o le tatou Fonotaga.

*Na faaalua le agaga fiafia o le Palemene i le patipati o latou aao i le maea ai o le saunoaga a le Fofoga Fetalai.*

**FOFOGA FETALAI:** Ona o lea ua tatou taunuu i siui o le tatou galuega, e i ai lea o le manatu, o le a tolopo nei Taulumaga a le Fono Aoaofaitulafono, seia toe tauaofia i le aso a taeao, i le itula e 10 i le taeao, mo le sauniga aloaia e faataapeina ai lenei Paeaiga Lona XVI a lo tatou Palemene o Samoa. O le faasilasila lena ma le faaaloalo i lenei taimi o le afiafi. Tolopoina le tatou Fonotaga seia aulia le itula e 10:00 a taeao mo le sauniga aloaia e faataape ai le tatou Palemene Lona XVI. O le faaaliga lea ma le agaga faaaloalo.

O lo o tapenaina e le Ofisa o le Fono si na iputi e faamaea ai le Fonotaga ma tatou talameafaasolo ai. Soifua ma ia manuia le Palemene, faapea foi Ofisa sili o Pulega o Matagaluega.

Ou te tapa le susuga i le alii faifeau, ia Alaiasa na te faaiuina le tatou Fonotaga i se tatalo ae tatou te le i tolopo.

*Na tolopo Taulumaga a le Fono Aoaofaitulafono i le itula e 8:00 i le po, seia aulia le Aso Lulu 03 Mati 2021, i le itula e 10:00 i le taeao.*